

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst ("Službene novine Zeničko-dobojskog kantona", broj: 7/10 i 3/23), na prijedlog Ministarstva za pravosuđe i upravu, Vlada Zeničko-dobojskog kantona, na 96. sjednici, održanoj dana 04.09.2025. godine, d o n o s i

ZAKLJUČAK

I.

Utvrđuje se Prijedlog Zakona o obilježavanju značajnih datuma.

II.

Zaključak sa Prijedlogom Zakona iz tačke I. ovog zaključka upućuje se u dalju skupštinsku proceduru po skraćenom postupku.

III.


Zaključak stupa na snagu danom donošenja.

Broj: 02-02-16393 /25

Datum, 04.09.2025. godine
Zenica

DOSTAVLJENO:

1x Ministarstvo za pravosuđe i upravu,
1x Stručna služba Skupštine,
1x a/a.



Na osnovu člana 17. i 37. stav (1) tačka f) Ustava Zeničko-dobojskog kantona, Skupština Zeničko-dobojskog kantona, na _____ sjednici održanoj dana _____ 2025. godine, d o n o s i:

ZAKON O OBILJEŽAVANJU ZNAČAJNIH DATUMA

DIO PRVI - OPĆE ODREDBE

Član 1. (Predmet)

Ovim zakonom utvrđuju se značajni datumi za Zeničko-dobojski kanton (u daljem tekstu: Kanton), nosioci obilježavanja značajnih datuma, planiranje i realizacija aktivnosti, kao i izvori i način finansiranja.

Član 2. (Cilj Zakona)

Cilj ovog zakona jeste njegovanje i obilježavanje datuma koji su značajni za Kanton i jedinice lokalne samouprave s područja Kantona.

Član 3. (Definicija značajnog datuma)

Značajni datum u smislu ovog zakona je datum koji se odnosi na historijske, kulturne, političke, društvene ili druge događaje koji imaju poseban značaj za Kanton i jedinice lokalne samouprave sa područja Kantona, a čije obilježavanje doprinosi očuvanju kolektivnog identiteta, sjećanja i tradicije Kantona i njegovih gradova i općina.

DIO DRUGI – ZNAČAJNI DATUMI, NOSIOCI, NAČIN OBILJEŽAVANJA I FINANSIRANJE, PLANIRANJE I REALIZACIJA AKTIVNOSTI

Član 4. (Utvrđivanje značajnih datuma)

- (1) Kao značajni datumi za Kanton utvrđuju se:
- a) 29. august - Dan Zeničko-dobojskog kantona;
 - b) Ostali datumi od značaja za Kanton i jedinice lokalne samouprave, utvrđeni posebnim aktima Vlade Zeničko-dobojskog kantona (u daljem tekstu: Vlada Kantona) ili Skupštine Zeničko-dobojskog kantona (u daljem tekstu: Skupština Kantona).
- (2) Obilježavanje državnih praznika Bosne i Hercegovine i drugih značajnih datuma, kao što su:
- a) 01. mart - Dan nezavisnosti Bosne i Hercegovine;
 - b) 25. novembar - Dan državnosti Bosne i Hercegovine;
 - c) 11. juli - Međunarodni dan sjećanja na genocid u Srebrenici;
- vrši se u skladu sa ovim zakonom i važećim državnim zakonima i propisima.

Član 5.

(Nosioци obilježavanja)

(1) Nosilac obilježavanja značajnog datuma iz člana 4. stav (1) tačka a) je Skupština Kantona.

(2) Vlada Kantona je nosilac obilježavanja ostalih datuma od značaja za Kanton i jedinice lokalne samouprave, kao i državnih praznika Bosne i Hercegovine i drugih značajnih datuma iz člana 4. stava (2).

(3) Vlada Kantona može ovlastiti i druge organe i institucije, jedinice lokalne samouprave sa područja Kantona, kao i organizacije civilnog društva, kulturna ili druga udruženja koja djeluju na području Kantona, da u njeno ime, kao nosioci aktivnosti obilježavanja, provedu aktivnosti vezane za obilježavanje značajnih datuma.

Član 6.

(Način obilježavanja)

(1) Obilježavanje značajnih datuma se organizuje se kroz obrazovne, naučne, kulturne i druge javne događaje.

(2) Aktivnosti na obilježavanju značajnih datuma obavljaju se u saradnji sa javnim ustanovama, organizacijama civilnog društva i jedinicama lokalne samouprave na području Kantona.

Član 7.

(Finansiranje aktivnosti)

(1) Sredstva neophodna za finansiranje aktivnosti obilježavanja značajnih datuma obezbjeđuju se iz budžeta Kantona.

(2) Skupština Kantona, u svom budžetskom zahtjevu, a Vlada Kantona, u budžetskim zahtjevima resornih ministarstava i Ureda premijera Zeničko-dobojskog kantona, su obavezni da planiraju sredstva koja su neophodna za aktivnosti obilježavanja značajnih datuma za narednu godinu.

(3) Osim na način predviđen stavom (1) sredstva za finansiranje aktivnosti na obilježavanju značajnih datuma mogu se obezbjeđiti iz donacija, sponzorstva i drugih izvora u skladu sa zakonom.

Član 8.

(Planiranje i realizacija aktivnosti)

(1) Vlada Kantona će na prijedlog Ureda premijera Zeničko-dobojskog kantona, a u okviru svojih nadležnosti i ovlaštenja, za svaku kalendarsku godinu donijeti Program obilježavanja značajnih datuma (u daljem tekstu: Program) iz člana 4. ovog zakona za svaki datum posebno, kojim će se planirati nosioci aktivnosti i realizacije, način obilježavanja i finansiranje i planirati medijska podrška i promocija aktivnosti radi što šireg informisanja javnosti.

(2) Kantonalna ministarstva su dužna u okviru svoje nadležnosti dostaviti prijedloge za izradu prijedloga Programa iz stava (1) ovog člana i izvršiti sve obaveze utvrđene Programom.

(3) Donošenje Programa iz stava (1) ovog člana vezano za obilježavanja Dana Zeničko-dobojskog kantona vršit će se prema odredbama Zakona o utvrđivanju i obilježavanju Dana Zeničko-dobojskog kantona („Službene novine Zeničko-dobojskog kantona“, broj: 6/13).

Član 9.

(Drugi značajni datumi)

(1) Skupština Kantona i Vlada Kantona mogu svojim posebnim odlukama odrediti i druge datume za koje se ocijeni da su u određenom vremenu od značaja za Kanton, a koji se ne obilježavaju svake godine već kao jubilej ili je iste potrebno obilježiti radi kulture sjećanja.

(2) Jedinice lokalne samouprave također mogu svojom odlukom utvrditi i druge značajne datume koji su od značaja zajednicu lokalne samouprave.

(3) Vlada Kantona može učestvovati u organizaciji i obilježavanju značajnih datuma za jedinicu lokalne samouprave.

DIO TREĆI - ZAVRŠNE ODREDBE

Član 10.

(Upotreba roda)

Svi izrazi u ovom zakonu dati u muškom gramatičkom rodu odnose se bez diskriminacije i na žene.

Član 11.

(Stupanje na snagu)

Ovaj zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj _____

Zenica, _____

**PREDSJEDAVAJUĆI
SKUPŠTINE**

Čazim Huskić

O B R A Z L O Ž E N J E

I - USTAVNI OSNOV ZA DONOŠENJE ZAKONA

Ustavni osnov za donošenje ovog zakona sadržan je u odredbi člana 17. Ustava Zeničko-dobojskog kantona kojom se propisuje da Kanton ima sve nadležnosti koje nisu Ustavom Federacije izričito povjerene federalnoj vlasti ili koje nisu Ustavom Federacije utvrđene kao zajedničke nadležnosti Federacije i Kantona te odredbama člana 37. kojom se propisuje da Skupština Kantona donosi zakone i ostale propise za izvršavanje kantonalnih nadležnosti.

II – RAZLOZI ZA DONOŠENJE

Obzirom da se shodno ranijim inicijativama u Skupštini Zeničko-dobojskog kantona, pojavila potreba za izradom Zakona o obilježavanju značajnih datuma i događaja na području Zeničko-dobojskog kantona, Ministarstvo za pravosuđe i upravu je imenovanjem Interresorne radne grupe za izradu teksta Zakona o obilježavanju značajnih datuma i događaja na području Zeničko-dobojskog kantona započelo postupak izrade teksta navedenog Zakona.

Interresorna radna grupa je u previđenom roku izradila tekst Zakona o obilježavanju značajnih datuma, te je predložila da su značajni datumi za Zeničko-dobojski kanton 29. august - Dan Zeničko-dobojskog kantona, koji se obilježava shodno Zakonu o utvrđivanju i obilježavanju Dana Zeničko-dobojskog kantona („Službene novine Zeničko-dobojskog kantona“, broj: 6/13), te da to mogu biti i datumi od značaja za Zeničko-dobojski kanton i jedinice lokalne samouprave an teritoriji ovog kantona, a koji su utvrđeni posebnim aktima Vlade Zeničko-dobojskog kantona ili Skupštine Zeničko-dobojskog kantona.

Nadalje, Interresorna radna grupa je predvidjela i obilježavanje državnih praznika Bosne i Hercegovine i drugih značajnih datuma, kao što su 01. mart - Dan nezavisnosti Bosne i Hercegovine, 25. novembar - Dan državnosti Bosne i Hercegovine i 11. juli - Međunarodni dan sjećanja na genocid u Srebrenici.

Ideja za propisivanje ovih datuma proistakla je iz činjenice da je Zakonom o praznicima Socijalističke Federativne Republike Jugoslavije ("Sl. list SFRJ" br. 6/1973) koji je Uredbom sa zakonskom snagom o preuzimanju i primjenjivanju saveznih zakona koji se u Bosni i Hercegovini primjenjuju kao republički zakoni ("Sl. list RBiH", br. 2/1992) preuzet i primjenjuje se u Bosni i Hercegovini, a koji ne definiše ove datume, te da Zakonom o proglašenju 1. marta Danom nezavisnosti Republike Bosne i Hercegovine ("Sl. list RBiH", br. 9/1995) i Zakonom o proglašenju 25. novembra Danom državnosti Republike Bosne i Hercegovine ("Sl. list RBiH", br. 9/1995), čije odredbe je Ustavni sud Bosne i Hercegovine u više navrata utvrdio da su u skladu sa Ustavom Bosne i Hercegovine, ali da navedeni zakoni ne tretiraju na koji način se obilježavaju Dan nezavisnosti i Dan državnosti te se s ciljem njegovanja i obilježavanja datuma koji su značajni za Bosnu i Hercegovinu, a samim tim i Zeničko-dobojski kanton i jedinice lokalne samouprave s područja ovog kantona, ukazala potreba za donošenjem ovakvog zakona.

Razlog za uvrštavanju 11 jula - Međunarodnog dana sjećanja na genocid u Srebrenici jeste činjenica da je Generalna skupština Ujedinjenih nacija usvojila 23.05.2024. godine usvojila Rezoluciju o genocidu u Srebrenici, kojom je 11. juli proglašen „Međunarodnim danom sjećanja i obilježavanja genocida u Srebrenici 1995. godine“, te da navedeni datum nije tretiran propisima u Bosni i Hercegovini na način kojim bi se adekvatno obilježio ovaj međunarodni dan.

Obzirom da je članom 160. Poslovnika Skupštine Zeničko-dobojskog kantona – Četvrti prečišćeni tekst („Službene novine Zeničko-dobojskog kantona“, broj: 5/24), predviđena mogućnost donošenja zakona po skraćenom postupku kada nije u pitanju složen i obiman zakon, Ministarstvo za pravosuđe i upravu odnosno Vlada Zeničko-dobojskog kantona će predložiti, iz navedenih razloga, da se isti donese po skraćenom postupku o čemu će odlučiti

Skupština Zeničko-dobojskog kantona kao o prethodnom pitanju na sjednici tokom rasprave o dnevnom redu.

Ministarstvo za pravosuđe i upravu je predloženi Zakon uputilo i na mišljenje Savezu općina i gradova Federacije Bosne i Hercegovine od kojih je aktom broj: 446/25 od 18.07.2025. godine obaviješteno da na dostavljeni Prijedlog Zakona nisu zaprimili komentare u ostavljenom roku, kao i obavilo konsultacije sa Uredom premijera Zeničko-dobojskog kantona shodno članu 64. Jedinstvenih pravila za izradu pravnih propisa u Zeničko-dobojskom kantonu („Službene novine Zeničko-dobojskog kantona“, broj 5/08).

Obzirom da je Uredbom o procjeni uticaja propisa ("Sl. novine FBiH", br. 67/20) regulisana procjena uticaja propisa na nivou Federacije Bosne i Hercegovine a da je cilj iste podsticanje međuinstitucionalne i međuvladine saradnje i koordiniranja nosioca izrade zakona, radi jednostavnijeg i bržeg usaglašavanja rješenja i ostvarivanja ciljeva, doprinosa jačanju transparentnosti kroz uključivanje svih zainteresiranih strana, uključujući javnost, u postupcima izrade, predlaganja, praćenja primjene, izvještavanja i evaluacije zakona, doprinos ekonomičnom, efikasnom, djelotvornom i transparentnom planiranju i korištenju budžetskih sredstava, i utvrđivanje mogućih prepreka za poslovanje preduzeća i status građana, Ministarstvo za pravosuđe i upravu je uradilo procjenu uticaja ovog propisa na osnovu navedene Uredbe te će ubuduće poduzimati potrebne aktivnosti kako bi se oblast uticaja propisa i njihove usklađenosti sa propisima Evropske unije regulisala u Zeničko-dobojskom kantonu, uz napomenu da se navedena procjena radi isključivo za nacрте zakona ali uzimajući obzir da je predloženo razmatranje Zakona u skraćenoj proceduri bez razmatranja nacрта, Ministarstvo za pravosuđe i upravu je smatralo da je potrebno uraditi i procjenu na ovakav način.

Ministarstvo za pravosuđe i upravu je predloženi Zakon uputilo i na Mišljenje Sekretarijatu za zakonodavstvo Vlade Zeničko-dobojskog kantona odnosno Ministarstvu finansija Zeničko-dobojskog kantona.

Obzirom na dato Mišljenje Sekretarijatu za zakonodavstvo Vlade Zeničko-dobojskog kantona, Ministarstvo za pravosuđe i upravu je konsultovalo i Stručnu službu Vlade odnosno Skupštine Zeničko-dobojskog kantona, čije su određene sugestije uvrštene u tekst Prijedloga Zakona.

III – PRAVNA RJEŠENJA

U **Prvom dijelu** Prijedloga Zakona o obilježavanju značajnih datuma definiše se predmet Prijedloga Zakona kao i nosioci obilježavanja značajnih datuma, planiranje i realizacija aktivnosti, kao i izvori i način finansiranja, cilj samog Zakona te definicija značajnog datuma.

U **Drugom dijelu** utvrđeni su značajni datumi kao i mogućnost Vlade odnosno Skupštine Zeničko-dobojskog kantona da mogu svojim posebnim aktima utvrditi i druge datume ukoliko su oni od značaja bilo za Zeničko-dobojski kantona bilo za jedinice lokalne samouprave sa područja ovog kantona.

Također, u ovom dijelu su utvrđeni nosioci obilježavanja značajnih datuma, mogućnost da nosioci obilježavanja ovlaste i druge organe i institucije, jedinice lokalne samouprave sa područja kantona, kao i organizacije civilnog društva, kulturna ili druga udruženja koja djeluju na području kantona, da u njihovo ime, kao nosioci aktivnosti obilježavanja, provedu aktivnosti vezane za obilježavanje značajnih datuma, te način obilježavanja, kao i obavezu planiranja aktivnosti koje se finansiraju iz budžeta Zeničko-dobojskog kantona.

U ovom dijelu predviđena je i obaveza donošenja posebnog Programa obilježavanja značajnih datuma i državnih praznika i datuma Bosne i Hercegovine, koji će se donositi za svaki datum posebno i za svaku kalendarsku godinu, na prijedlog Ureda premijera Zeničko-dobojskog kantona, izuzev Progra za obilježavanje Dana Zeničko-dobojskog kantona koji će se obilježavati shodno odredbama Zakona o utvrđivanju i obilježavanju Dana Zeničko-dobojskog kantona („Službene novine Zeničko-dobojskog kantona“, broj: 6/13).

Definisana je i mogućnost da jedinice lokalne samouprave mogu svojom odlukom utvrditi i druge značajne datume koji su od značaja zajednicu lokalne samouprave, u okviru čijeg organizovanja i obilježavanja može učestvovati i Vlada Zeničko-dobojskog kantona te da se mogu posebnim odlukama odrediti i drugi datumi za koje se ocijeni da su u određenom vremenu od značaja za ovaj kanton, a koji se ne obilježavaju svake godine već kao jubilej ili je iste potrebno obilježiti radi kulture sjećanja.

U **Trećem dijelu** utvrđene su završne odredbe u smislu upotrebe roda i stupanja na snagu ovog zakona.

IV – FINANSIJSKA SREDSTVA

Za donošenje Prijedloga Zakona o obilježavanju značajnih datuma nisu potrebna dodatna sredstva u Budžetu Zeničko-dobojskog kantona za 2025. godinu, a u slučaju potrebe za dodatnim sredstvima nosioci obilježavanja su dužni ista obezbjediti unutrašnjim preraspodjelama.

OBRAZAC ZA PROVOĐENJE SKRAĆENE PROCJENE UTJECAJA PROPISA

Naziv aktivnosti	Analiza normativnog okvira propisa kojim se utvrđuju značajni datumi Zeničko-dobojskog kantona, kao i način njihovog obilježavanja.
Naziv prednacrt/nacrta zakona	Zakon o obilježavanju značajnih datuma
Datum	Juli 2025. godine
Obradivač	Ministarstvo za pravosuđe i upravu Zeničko-dobojskog kantona
I - Usklađenost prednacrt/nacrta zakona sa strateškim dokumentima i Programom rada Vlade Zeničko-dobojskog kantona i Skupštine Zeničko-dobojskog kantona	
<i>Je li prednacrt/nacrt zakona usklađen sa strateškim dokumentima i Programom rada Vlade Zeničko-dobojskog kantona i Skupštine Zeničko-dobojskog kantona?</i> Odgovor: Donošenje Zakona o obilježavanju značajnih datuma i događaja na području Zeničko-dobojskog kantona utvrđeno je Programom rada Skupštine Zeničko-dobojskog kantona za 2018. godinu u okviru Ostalih oblasti je realizaciju istog Vlada Zeničko-dobojskog kantona, na prijedlog Ministarstva za rad, socijalnu politiku i izbjeglice formirala Interresornu radnu grupu s ciljem izrade teksta navedenog Zakona. Obzirom da do 2025. godine Vlada odnosno Skupština Zeničko-dobojskog kantona nije razmatrala tekst zakona kojim bi se uredila predmetna oblast, Vlada Zeničko-dobojskog kantona je 2025. godine formirala Interresornu radnu grupu za izradu teksta Zakona o obilježavanju značajnih datuma i događaja na području Zeničko-dobojskog kantona, koja je izvršila zadatak te ovom ministarstvu dostavila tekst Zakona.	
<i>Je li prednacrt/nacrt zakona povezan za druge važeće propise ili ima učinak na druge važeće propise? Ako DA, navedite koje:</i> Odgovor: DA Zakon o obilježavanju značajnih datuma jeste povezan za druge važeće propise, a naročito na: - Zakon o utvrđivanju i obilježavanju Dana Zeničko-dobojskog kantona („Službene novine Zeničko-dobojskog kantona“, broj: 6/13); - Zakon o praznicima Socijalističke Federativne Republike Jugoslavije ("Sl. list SFRJ" br. 6/1973) koji je Uredbom sa zakonskom snagom o preuzimanju i primjenjivanju saveznih zakona koji se u Bosni i Hercegovini primjenjuju kao republički zakoni ("Sl. list RBiH", br. 2/1992) preuzet i primjenjuje se u Bosni i Hercegovini; - Zakon o proglašenju 1. marta Danom nezavisnosti Republike Bosne i Hercegovine ("Sl. list RBiH", br. 9/1995);	

- Zakon o proglašenju 25. novembra Danom državnosti Republike Bosne i Hercegovine ("Sl. list RBiH", br. 9/1995)
II - Ocjena trenutnog stanja i ciljevi koji se žele postići prednacrtom/nacrtom zakona
1) Koji je osnovni problem? Zašto postojeće stanje nije zadovoljavajuće? Odgovor: Ideja za propisivanje ovih datuma proistakla je iz činjenice da je Zakonom o praznicima Socijalističke Federativne Republike Jugoslavije ("Sl. list SFRJ" br. 6/1973) koji je Uredbom sa zakonskom snagom o preuzimanju i primjenjivanju saveznih zakona koji se u Bosni i Hercegovini primjenjuju kao republički zakoni ("Sl. list RBiH", br. 2/1992) preuzet i primjenjuje se u Bosni i Hercegovini, a koji ne definiše ove datume, te da Zakonom o proglašenju 1. marta Danom nezavisnosti Republike Bosne i Hercegovine ("Sl. list RBiH", br. 9/1995) i Zakonom o proglašenju 25. novembra Danom državnosti Republike Bosne i Hercegovine ("Sl. list RBiH", br. 9/1995), čije odredbe je Ustavni sud Bosne i Hercegovine u više navrata utvrdio da su u skladu sa Ustavom Bosne i Hercegovine, ali da navedeni zakoni ne tretiraju na koji način se obilježavaju Dan nezavisnosti i Dan državnosti te se s ciljem njegovanja i obilježavanja datuma koji su značajni za Bosnu i Hercegovinu, a samim tim i Zeničko-dobojski kanton i jedinice lokalne samouprave s područja ovog kantona, ukazala potreba za donošenjem ovakvog zakona. Razlog za uvrštavanju 11 jula - Međunarodnog dana sjećanja na genocid u Srebrenici jeste činjenica da je Generalna skupština Ujedinjenih nacija usvojila 23.05.2024. godine usvojila Rezoluciju o genocidu u Srebrenici, kojom je 11. juli proglašen „Međunarodnim danom sjećanja i obilježavanja genocida u Srebrenici 1995. godine“, te da navedeni datum nije tretiran propisima u Bosni i Hercegovini na način kojim bi se adekvatno obilježio ovaj međunarodni dan.
2) Koji cilj se želi postići? U kojoj mjeri se očekuje da će prednacrt/nacrt zakona riješiti definirani problem i u kojem razdoblju? Odgovor: Cilj koji se želi postići jeste adekvatno obilježavanje značajnih datuma na području Zeničko-dobojskog kantona kroz organizovanje obrazovnih, naučnih, kulturnih i drugih javnih događaja.
3) Navedite sve subjekte (ministarstva, uprave, upravne organizacije, organizacije civilnog društva, itd.) koji će izravno primjenjivati i na koje se izravno odnosi prednacrt/nacrt zakona. Odgovor: Kantonalni nivo - svi organi zakonodavne i izvršne vlasti, organi uprave, upravne organizacije, javna preduzeća, javne ustanove, organizacije civilnog društva i sve jedinice lokalne samouprave na području Zeničko-dobojskog kantona.
III - Proces konsultacija
1) Navedite sve subjekte s kojima ste se konsultirali i način na koji ste vršili konsultacije (javna rasprava, pisani komentari, itd.) Odgovor:

Obzirom da je članom 160. Poslovnika Skupštine Zeničko-dobojskog kantona – Četvrti prečišćeni tekst (“Službene novine Zeničko-dobojskog kantona”, broj: 5/24), predviđena mogućnost donošenja zakona po skraćenom postupku kada nije u pitanju složen i obiman zakon, Ministarstvo za pravosuđe i upravu odnosno Vlada Zeničko-dobojskog kantona će predložiti, iz navedenih razloga, da se isti donese po skraćenom postupku o čemu će odlučiti Skupština Zeničko-dobojskog kantona kao o prethodnom pitanju na sjednici tokom rasprave o dnevnom redu iz razloga što se ne radi o obimnom zakonu.

Ministarstvo za pravosuđe i upravu je predloženi Zakon uputilo i na mišljenje Savezu općina i gradova Federacije Bosne i Hercegovine koje je predmetni Zakon uputilo svim lokalnim zajednicama na pdoručju Zeničko-dobojskog kantona nakon čega je obavijestilo ovo ministarstvo da na predloženi tekst nisu zaprimili primjedbe, te planira obaviti konsultacije sa Uredom premijera Zeničko-dobojskog kantona shodno članu 64. Jedinstvenih pravila za izradu pravnih propisa u Zeničko-dobojskom kantonu („Službene novine Zeničko-dobojskog kantona“, broj 5/08).

2) *Koji su rezultati konsultacija i da li su uticali na sadržaj novog zakona?*

Odgovor:

Obzirom da do sada nije bilo primjedbi iste nisu uticale na tekst ovog zakona.

IV - Alternativna rješenja – identifikacija opcija

1) *Navedite opcije koje ste razmatrali, a kojima se može riješiti definirani problem i ostvariti cilj. Kratko opišite rezultate analize svake od tih opcija.*

Odgovor:

Obzirom da predmetna oblast nije adekvatno uređena kako na nivou Bosne i Hercegovine tako i na području Zeničko-dobojskog kantona ista nema alternativnih rješenja kojim bi se postigao cilj Zakona.

2) *Objasnite zašto je izabrana opcija najpovoljnija za rješenje problema.*

Odgovor:

Usvajanje ovakvog zakona omogućit će institucijama vlasti sa područja Zeničko-dobojskog kantona adekvatno obilježavanja datuma koji se odnose na historijske, kulturne, političke, društvene ili druge događaje koji imaju poseban značaj za Kanton i jedinice lokalne samouprave sa područja Kantona, a čije obilježavanje doprinosi očuvanju kolektivnog identiteta, sjećanja i tradicije Kantona i njegovih gradova i općina.

V - Utjecaj odabranog rješenja problema na privredu, društvo i okoliš

1a) *Utiče li prednacrt/nacrt zakona na poslovno okruženje? Kreira li dodatna administrativna opterećenja? Utiče li na rad malih i srednjih preduzeća i obrtnika? Hoće li imati uticaja na funkcioniranje tržišta i konkurenciju?*

Odgovor:

NE.

1b) *Koji su finansijski učinci prednacrt/nacrt zakona? Utiče li na operativne troškove i obavljanje poslovanja? Utiče li na priliv sredstava u javne budžete?*

Odgovor:

NE

2a) *Utiče li prednacrt/nacrt zakona na mogućnost zapošljavanja i tržište rada?*

Odgovor:

NE

2b) *Tretira li prednacrt/nacrt zakona pitanje ravnopravnosti spolova? Je li osigurana socijalna uključenost i zaštita posebnih skupina? Daje li mogućnost pristupa zdravstvenoj i socijalnoj skrbi i obrazovanju?*

Odgovor:

Ovaj prijedlog zakona ne tretira navedene kategorije.

3) *Hoće li prednacrt/nacrt zakona imati utjecaje na okoliš?*

a) DA

b) NE

Objasnite:

Zakon o obilježavanju značajnih datuma, kao model koji se predlaže nema negativni uticaj na okoliš.

VI - Provođenje zakona

1) *Precizira li prednacrt/nacrt zakona ko je odgovoran za njegovu primjenu i na koji način? Koji nivo vlasti je nadležan za primjenu? Ko vrši nadzor?*

Odgovor:

Da, organi vlasti Zeničko-dobojskog kantona (Skupština i Vlada) definisani su kao nosioci obilježavanja značajnih datuma.

2) *Je li prednacrt/nacrt zakona usaglašen s drugim važećim propisima?*

Odgovor:

DA

3) *Je li prijelazno razdoblje s postojećeg rješenja na novi prednacrt/nacrt zakona jasno definirano?*

Odgovor:

Obzirom da ova oblast nije uređena samim tim nema ni potrebe za definiranje prijelaznog razdoblja.

OBRAZAC IZJAVA O FISKALNOJ PROCJENI										Obrazac IFP NE	
A 1. Obradivač propisa											
Razdjel		KOD		MINISTARSTVO ZA PRAVOSUDE I UPRAVU							
		160100001									
B 2. Osnovni podaci o prijedlogu propisa											
Vrsta propisa/akta		Zakon		DA		Odluka		Strategija		NE	
		Uredba		NE		Drugi akti		Drugi akti planiranja		NE	
Naziv propisa/akta		Prijedlog Zakona o obilježavanju značajnih datuma									
C 3. Izjava o nepostojanju dodatnih fiskalnih efekata predložеног propisa											
Za donošenje Prijedloga Zakona o obilježavanju značajnih datuma nisu potrebna dodatna sredstva u Budžetu Zeničko-dobojskog kantona za 2025. godinu, a u slučaju potrebe za dodatnim sredstvima, nosioci obilježavanja su dužni ista obezbijediti unutrašnjim preraspodjelama.											
D 4. Pečat i potpis odgovornog lica obrađivača, odnosno predlagača propisa								Mjesto i datum		Zenica, 12.08.2025. godine	



Broj: 07-04-3-9284-7/25
Zenica, 13.08.2025. godine

MINISTARSTVO ZA PRAVOSUĐE I UPRAVU

PREDMET: Mišljenje na Prijedlog Zakona o obilježavanju značajnih datuma - *dostavlja se*

Ministarstvo finansija je razmotrilo Prijedlog Zakona o obilježavanju značajnih datuma, koji je dostavljen na mišljenje uz akt Ministarstva za pravosuđe i upravu Zeničko-dobojskog kantona, broj: 06-04-3-9284-7/25 od 12.08.2025. godine, te u skladu sa članom 8. Pravilnika o proceduri izrade izjave o fiskalnoj procjeni zakona, drugih propisa i akata planiranja na budžet („Službene novine Federacije BiH“, broj: 34/16 i 15/18) i članom 31. stav (1) tačka c) Poslovnika o radu Vlade Zeničko-dobojskog kantona („Službene novine Zeničko-dobojskog kantona“, broj: 10/21), u pogledu finansijskih sredstava potrebnih za izvršenje ovog propisa, odnosno o fiskalnoj procjeni propisa, daje slijedeće

MIŠLJENJE

Članom 5. stav 2. Zakona o budžetima u Federaciji BiH („Službene novine FBiH“, broj: 102/13, 9/14, 13/14, 8/15, 91/15, 102/15, 104/16, 5/18, 11/19, 99/19, 25a/22 i 7/25), propisano je da „propisi koji imaju finansijske posljedice na budžet moraju biti obrazloženi, odnosno opravdani analizom troškova i koristi“, a članom 42. stav 1. istog Zakona, propisano je da „prijedlozi zakona, uredbi i drugih propisa koje Vlada donosi ili predlaže donošenje Parlamentu moraju sadržavati procjenu finansijskih efekata na budžet.“

Članom 21. stav 2. Zakona o organizaciji organa uprave u Federaciji BiH („Službene novine Federacije BiH“, broj: 35/05), propisano je da „ako se za provođenje zakona ili drugog propisa koji se predlažu moraju osigurati određena finansijska sredstva, organi uprave obavezni su u obrazloženju tog propisa iskazati orijentacijski iznos finansijskih sredstava koja su potrebna za njegovo izvršavanje i odrediti izvore iz kojih treba osigurati ta sredstva.“

Članom 30. stav (1) Poslovnika o radu Vlade Zeničko-dobojskog kantona („Službene novine Zeničko-dobojskog kantona“, broj: 10/21), propisano je da obrazloženje propisa, između ostalog sadrži „visinu i izvor finansijskih sredstava potrebnih za provođenje propisa“, a članom 63. stav (1) Jedinostvenih pravila za izradu pravnih propisa u Zeničko-dobojskom kantonu („Službene novine Zeničko-dobojskog kantona“, broj: 5/08), propisano je da: „Obrazloženje finansijskih sredstava sadrži procjenu potrebnih sredstava, izvora i metoda osiguranja tih sredstava za provođenje propisa.“

U dostavljenom Obrazloženju Prijedloga Zakona o obilježavanju značajnih datuma je između ostalog navedeno da za donošenje Prijedloga Zakona „nisu potrebna dodatna sredstva u Budžetu Zeničko-dobojskog kantona za 2025. godinu, a u slučaju potrebe za dodatnim sredstvima nosioci obilježavanja su dužni ista obezbjediti unutrašnjim preraspodjelama“.

Također, u Izjavi o fiskalnoj procjeni – Obrazac IFP-NE od 12.08.2025. godine, navedeno je: „Za donošenje Prijedloga Zakona o obilježavanju značajnih datuma nisu potrebna dodatna sredstva u Budžetu Zeničko-dobojskog kantona za 2025. godinu, a u slučaju potrebe za dodatnim sredstvima, nosioci obilježavanja su dužni ista obezbjediti unutrašnjim preraspodjelama“.

Imajući u vidu odredbe Zakona o budžetima u Federaciji BiH, obim preuzimanja obaveza od strane Budžeta Zeničko-dobojskog kantona po osnovu ovoga Prijedloga Zakona, može se vršiti samo do iznosa planiranog za navedene namjene u Budžetu Zeničko-dobojskog kantona za 2025. godinu i u Budžetima Kantona za naredne budžetske godine.

Odredbama tačke 8. Uputstva o izvršavanju budžeta sa jedinstvenog računa trezora („Službene novine Federacije BiH“, broj: 34/16), propisano je: „Odgovornost za planiranje i stvaranje obaveza u okviru propisanog budžeta je isključivo na rukovodiocu budžetskog korisnika.“

Odredbama člana 25. stav (2) Poslovnika o radu Vlade Zeničko-dobojskog kantona („Službene novine Zeničko-dobojskog kantona“, broj: 10/21), propisano je:

„Predlagač materijala je odgovoran da prijedlog materijala koji se dostavlja radi razmatranja na sjednicama Vlade bude u skladu sa Ustavom, važećim zakonima i provedbenim propisima.“

S tim u vezi, Ministarstvo finansija ne snosi odgovornost za pravna rješenja predložena od strane obrađivača u dostavljenom Prijedlogu Zakona.

Imajući u vidu gore navedeno Obrazloženje Prijedloga Zakona i dostavljenu Izjavu o fiskalnoj procjeni, u kojima je navedeno da za donošenje Prijedloga Zakona o obilježavanju značajnih datuma, „nisu potrebna dodatna sredstva u Budžetu Zeničko-dobojskog kantona za 2025. godinu“, Ministarstvo finansija nema drugih primjedbi i sugestija iz svoje nadležnosti.

Međutim, u slučaju eventualne potrebe za dodatnim sredstvima za provedbu navedenog Prijedloga Zakona, nedostajuća finansijska sredstva kroz uštede i unutrašnje preraspodjele sredstava, obavezni su obezbijediti nosioci obilježavanja značajnih datuma.

S poštovanjem!

Dostavljeno:

1x Naslovu,
1x a/a.





Broj: 03-04-9284-7/25

Zenica, 13.08.2025. godine

**MINISTARSTVO ZA PRAVOSUĐE I UPRAVU
ZENIČKO-DOBOJSKOG KANTONA**

PREDMET: Mišljenje o Prijedlogu Zakona o obilježavanju značajnih datuma - dostavlja se
- Veza Vaš akt broj: 06-04-3-9284-6/25 od 12.08.2025. godine -

3

U skladu sa članom 2. Uredbe o Sekretarijatu za zakonodavstvo Vlade Zeničko-dobojskog kantona („Službene novine FBiH“, broj: 8/96 i „Službene novine Zeničko-dobojskog kantona“, broj: 2/05) i članom 31. stav (1) tačka a) Poslovnika o radu Vlade Zeničko-dobojskog kantona („Službene novine Zeničko-dobojskog kantona“, broj: 10/21), te na osnovu uvida u Prijedlog Zakona o obilježavanju značajnih datuma, u postupku koji se odnosi na utvrđivanje usklađenosti istog sa Ustavom, pravnim sistemom i metodološkim jedinstvom u izradi propisa dostavljamo vam slijedeće

MIŠLJENJE

Ustavni i pravni osnov Prijedloga Zakona o obilježavanju značajnih datuma je pravilno utvrđen, te je isti usklađen sa pravnim sistemom.

U nomotehničkom smislu, Prijedlog Zakona o obilježavanju značajnih datuma je urađen u skladu sa Jedinstvenim pravilima za izradu pravnih propisa u Zeničko-dobojskom kantonu („Službene novine Zeničko-dobojskog kantona“, broj 5/08).

Kada je u pitanju prijedlog obrađivača da se Zakon o obilježavanju značajnih datuma donese po skraćenom postupku, smatramo potrebnim podsjetiti da se zakoni u pravilu donose u redovnom postupku, te će se o istom odlučivati na sjednici Skupštine Zeničko-dobojskog kantona, kao o prethodnom pitanju, u okviru rasprave o dnevnom redu, shodno članu 140. stav 3. Poslovnika Skupštine Zeničko-dobojskog kantona – Četvrti prečišćeni tekst („Službene novine Zeničko-dobojskog kantona“, broj: 5/24 i 8/25).

Sobzirom na navedeno i nakon obavljenih konsultacija, stekli su se uvjeti za davanje mišljenja shodno članu 31. stav (1) tačka a) Poslovnika o radu Vlade Zeničko-dobojskog kantona („Službene novine Zeničko-dobojskog kantona“, broj: 10/21), te se Prijedlog Zakona o obilježavanju značajnih datuma može uputiti u dalju proceduru.

Dostavljeno:

☒ Naslovu,

☐ a/a.





Broj: 02-1-04-3-9284-5-1/25

Datum, 11.08.2025. godine

ZENIČKO-DOBOJSKI KANTON
MINISTARSTVO ZA PRAVOSUĐE I UPRAVU
N/R MINISTRA

PREDMET: Sugestije na Prijedlog Zakona o obilježavanju značajnih datuma, *dostavljaju se*

Veza: Vaš akt broj: 06-04-3-9284-5/25 od 05.08.2025. godine

- Mišljenje Sekretarijata za zakonodavstvo broj: 03-04-9284-4/25 od 04.08.2025. godine

Poštovani,

postupajući povodom vašeg akta broj: 06-04-3-9284-5/25 od 05.08.2025. godine, kojim, pozivajući se na stajalište Sekretarijata za zakonodavstvo izneseno u Mišljenju datom na tekst Prijedloga Zakona o obilježavanju značajnih datuma, broj: 03-04-9284-4/25 od 04.08.2025. godine, u kojem se navodi da je potrebno obaviti konsultacije sa Stručnom službom Skupštine, kao i Stručnom službom Vlade Zeničko-dobojskog kantona zbog nadležnosti propisanih u članu 2. Uredbe o Stručnoj službi Vlade Zeničko-dobojskog kantona, tražite hitnu dostavu sugestija na tekst Prijedloga Zakona o obilježavanju značajnih datuma iz okvira naših nadležnosti, očitujemo se kako slijedi:

- Članom 2. Uredbe o Stručnoj službi Vlade Zeničko-dobojskog kantona („Službene novine Zeničko-dobojskog kantona“, broj: 13/06) definirana je nadležnost Stručne službe Vlade i u kontekstu navedenih nadležnosti Stručna služba Vlade nema sugestija u odnosu na dostavljeni Prijedlog Zakona o obilježavanju značajnih datuma;

- U kontekstu stajalište Sekretarijata za zakonodavstvo iznesenom u Mišljenju datom na tekst Prijedloga Zakona o obilježavanju značajnih datuma, broj: 03-04-9284-4/25 od 04.08.2025. godine, u kome se navodi da je potrebno obaviti konsultacije sa Stručnom službom Skupštine i Stručnom službom Vlade Zeničko-dobojskog kantona u odnosu na odredbu člana 5. stav (1) Prijedloga Zakona citat „Nosilac obilježavanja značajnih datuma iz člana 4. ovog zakona su Skupština i Vlada Kantona“ smatramo svrsishodnim da se ukaže na moguće poteškoće u implementaciji zbog neprecizne formulacije kada se odredbe člana 5. dovedu u vezu sa članom 7. stav (1) i (2) Prijedloga Zakona citat: „(1) Sredstva za finansiranje aktivnosti obilježavanja značajnih datuma obezbjeđuju se iz budžeta Kantona. (2) Nosioci obilježavanja navedeni u članu 5. ovog zakona su obavezni da prilikom izrade budžetskih zahtjeva za narednu godinu planiraju sredstva koja su im neophodna za aktivnosti obilježavanja značajnih datuma.“ i članom 8. stav (1) i (2) Prijedloga Zakona citat: „(1) Vlada

Kantona će na prijedlog Ureda premijera Zeničko-dobojskog kantona, za svaku kalendarsku godinu donijeti Program obilježavanja značajnih datuma i državnih praznika i datuma Bosne i Hercegovine (u daljem tekstu: Program) iz člana 4. ovog zakona za svaki datum posebno, kojim će se planirati nosioci aktivnosti i realizacije, način obilježavanja i finansiranja. (2) Kantonalna ministarstva su dužna u okviru svoje nadležnosti dostaviti prijedloge za Program iz stava (1) ovog člana i izvršiti sve obaveze utvrđene Programom.“ Naime, u budžetu Zeničko-dobojskog kantona, za razliku od Skupštine Kantona, Vlada Kantona se ne navodi kao budžetski korisnik, a Prijedlogom Zakona nije precizirano koji od budžetskih korisnika, odnosno koje ministarstvo ili drugo tijelo kantonalne uprave je dužno prilikom izrade budžetskog zahtjeva za narednu godinu planirati sredstva koja su neophodna za aktivnosti obilježavanja značajnih datuma.

Također, navedenu problematiku treba dovesti u vezu i sa članom 4. stav (1) alineja b) Prijedloga Zakona citat: „b) Ostali datumi od značaja za kanton i jedinice lokalne samouprave, utvrđeni posebnim aktima Vlade Zeničko-dobojskog kantona (u daljem tekstu: Vlada Kantona) ili Skupštine Zeničko-dobojskog kantona (u daljem tekstu: Skupština kantona“ i članom 9. stav (2) i (3) Prijedloga Zakona citat: „(2) Vlada Kantona može učestvovati u organizaciji i obilježavanju značajnih datuma za jedinice lokalne samouprave. (3) Skupština kantona i Vlada Kantona mogu svojim posebnim odlukama odrediti i druge datume za koje ocijene da su u određenom vremenu od značaja za Kanton, a koji se ne obilježavaju svaku godinu već kao jubilej ili je iste potrebno obilježiti radi kulture sjećanja.“, sve dovodeći u vezu sa načinom rada i odlučivanja Vlade i ključnom ulogom predlagača materijala u tom postupku (predlagača akata Vlade iz člana 2. stav (1) tačka b) i predlagača odluke iz člana 9. stav (2) i (3) Prijedloga Zakona) i obezbjeđenja sredstva za te namjene u budžetu kod konkretnog budžetskog korisnika.

Smatramo da bi implementacija ovog zakona iz pozicije Vlade Zeničko-dobojskog kantona bila precirana i jasnije definisana, obzirom da su Prijedlogom Zakona utvrđene obaveze ministarstava i Ureda premijera Zeničko-dobojskog kantona, kada bi član 7. stav (2) Prijedloga Zakona glasio: „Skupština Kantona, u svom budžetskom zahtjevu, a Vlada Kantona, u budžetskim zahtjevima resornih ministarstava i Ureda premijera Zeničko-dobojskog kantona, su obavezni da planiraju sredstva koja su neophodna za aktivnosti obilježavanja značajnih datuma za narednu godinu.

Dostavljeno:

1x Naslovu,

1x a/a



SEKRETAR VLADE

Nedžad Mulagić



Broj: 01-04-9284-6/25
Zenica, 08.08.2025. godine

ZENIČKO-DOBOJSKI KANTON
Ministarstvo za pravosuđe i upravu
n/r ministra

PREDMET: Prijedlozi i sugestije na Prijedlog Zakona o obilježavanju značajnih datuma
– dostavljaju se
VEZA: Vaš akt broj: 06-04-3-9284-5/25 od 05.08.2025. godine

Aktom veze broj i datum gornji, koji je u Stručnoj službi Skupštine Zeničko-dobojskog kantona zaprimljen dana 06.08.2025. godine, zatražili ste da vam, u okviru naše nadležnosti, u što kraćem roku dostavimo eventualne sugestije na Prijedlog Zakona o obilježavanju značajnih datuma, (koji ste nam u prilogu dostavili), a shodno datom Mišljenju Sekretarijata za zakonodavstvo broj: 03-04-9284-4/25 od 04.08.2025. godine, (koje ste nam takođe u prilogu dostavili), **u vezi čega vam dostavljamo naše slijedeće prijedloge i sugestije:**

U članu 1. Prijedloga navedenog Zakona, predlažemo da se brišu riječi „na području“ iz razloga što je propisano da se za riječi „području Zeničko-dobojskog kantona“ koristi termin „Kantona“ u ostalom tekstu Zakona taj termin u kontekstu pojedinih odredbi nema značenje područja. Sugerishemo da se član 4. preformuliše i da se svi značajni datumi utvrde u stavu (1) npr:

- (1) Kao značajni datumi za Kanton utvrđuju se:
 - a) 29. august -Dan Zeničko- dobojskog kantona;
 - b) 01. mart-Dan nezavisnosti Bosne i Hercegovine;
 - c) 25. novembar-Dan državnosti Bosne i Hercegovine;
 - d) 11. juli-Međunarodni dan sjećanja na genocid u Srebrenici.

Sugerishemo da se u okviru ovog člana definišu i odredbe kojima se utvrđuju i ostali datumi od značaja kao i drugi datumi od značaja za Kanton, npr.

- (2) Skupština Zeničko-dobojskog kantona (u daljem tekstu: Skupština Kantona) ili Vlada Zeničko-dobojskog kantona (u daljem tekstu: Vlada Kantona) može posebnim aktima utvrditi ostale datume od značaja za Kanton.
- (3) Skupština Kantona ili Vlada Kantona mogu svojim posebnim odlukama odrediti i druge datume za koje se ocijeni da su u određenom vremenu od značaja za Kanton, a koji se ne obilježavaju svake godine već kao jubilej ili je iste potrebno obilježiti radi kulture sjećanja.

U članu 5. da se u stavu (1) jasno naglasi ko je nosilac obilježavanja za svaki značajan datum iz člana 4. iz razloga što se trenutno predloženim rješenjem može zaključiti da su i Vlada Kantona i Skupština Kantona istovremeno nosioci obilježavanja značajnih datuma, te predlažemo da nosilac obilježavanja značajnog datuma 29. august bude Skupština Kantona, a nosilac obilježavanja državnih praznika Bosne i Hercegovine i drugih značajnih datuma bude Vlada Kantona, koja će u Programu obilježavanja značajnih datuma za određenu kalendarsku godinu, shodno svojim ovlaštenjima, zadužiti pojedina kantonalna ministarstva za nosioce aktivnosti obilježavanja određenih državnih praznika Bosne i Hercegovine i drugih značajnih datuma, te time raspodjeliti teret obaveza vezanih za isto, kao i za obezbjeđivanje potrebnih budžetskih sredstava.

Član 5. stav (2) Prijedloga navedenog Zakona, sa aspekta nadležnosti Skupštine Zeničko-dobojskog kantona, nije provodiv jer ne postoji pravni osnov, (ni u Ustavu Kantona, ni u Poslovniku Skupštine Zeničko-dobojskog kantona), po kojem bi Skupština Kantona, kao zakonodavno tijelo kantona, mogla nekoga ovlastiti da u njeno ime provede neke aktivnosti čiji bi ona bila nosilac.

U vezi **člana 4.** mišljenja smo da bi se se obilježavanja državnih praznika Bosne i Hercegovine i drugih značajnih datuma iz člana 4. stav (2) moglo prebaciti u član 6. na način da se doda novi stav (3) kojim bi se propisalo da se obilježavanje državnih praznika Bosne i Hercegovine i drugih značajnih datuma iz člana 4. vrši u skladu sa ovim Zakonom i važećim državnim zakonima i propisima iz razloga što član 6. i nosi naziv „Način obilježavanja“.

Član 8. stav (1) sugerišemo da se mijenja na način da glasi: „Vlada Kantona će na prijedlog Ureda premijera Zeničko-dobojskog kantona, a u okviru svojih nadležnosti i ovlaštenja, za svaku kalendarsku godinu donijeti Program obilježavanja značajnih datuma (u daljem tekstu: Program) iz člana 4. ovog Zakona za svaki datum posebno, kojim će se planirati nosioci aktivnosti i realizacije, način obilježavanja i finansiranje i planirati medijska podrška i promocija aktivnosti radi što šireg informisanja javnosti, a da se radi preciznosti u stavu (2) istog člana umjesto riječi „Program“ dodaju riječi „izradu prijedloga Programa“.

Dalje u **članu 9.** sugerišemo da se stav (3) prebaci u član 4. kojim se utvrđuju značajni datumi Kantona (kako smo već u gore navedenom tekstu u vezi člana 4. predložili), a da se članom 9. samo uređuje donošenje odluka jedinica lokalne samouprave.

Ukoliko prihvatite gore navedeni prijedlog u vezi izmjene člana 8. stav (1) i da medijska podrška i promocija aktivnosti radi što šireg informisanja javnosti bude obavezan dio svakog pojedinačnog programa obilježavanja kojim bi se regulisali i nosioci ove aktivnosti, a ne da to bude zaduženje nosioca obilježavanja tačnije Skupštine Kantona i Vlade Kantona, bilo bi potrebno brisati **član 10. zakona.**

Takođe želimo ukazati na potrebu da se kao nosilac određenih aktivnosti za obilježavanje značajnih datuma iz naše istorije, (bilo u samom zakonu ili u Programu obilježavanja značajnih datuma i državnih praznika i datuma Bosne i Hercegovine), više uključi i za to zaduži Ministarstvo za obrazovanje, nauku, kulturu i sport ZDK. Isto bi trebalo da bude i nosilac aktivnosti i za obilježavanje Dana Zeničko-dobojskog kantona, imajući u vidu da je kao Dan Kantona određen datum 29.08., iz razloga što je na taj datum potpisana Povelja bosanskog bana Kulina (1180- 1204.) u Dubrovniku 1189. godine, a koja predstavlja najstariju bosansku ispravu na narodnom jeziku i jedan od najstarijih slavenskih pisanih spomenika, uopće-dakle radi se o istorijskom događaju, što je u nadležnosti navedenog kantonalnog ministarstva, a ne Skupštine Kantona

U konačnici, sugerišemo da se predmetnim Prijedlogom Zakona definišu i odredbe kojima bi se dala mogućnost nosiocima obilježavanja značajnih datuma da shodno svojim nadležnostima i ovlaštenjima mogu imenovati odbor za obilježavanje kao i pododbore. Isto smatramo poželjnim naročito u situaciji kada se pojedinačnim programom obilježavanja planira provođenje više aktivnosti sa više različitih nosioca aktivnosti, a s ciljem koordinacije između istih, posebno imajući u vidu dosadašnju negativnu praksu prilikom sprovođenja određenih aktivnosti predviđenim Programom obilježavanja Dana Kantona za određenu godinu, kada se pojedini nosioci aktivnosti uopšte ne angažuju oko sprovođenja aktivnosti za koje su u pomenutom Programu navedeni kao nosioci istih, tako da teret sprovođenja tih aktivnosti „padne“ na Stručnu službu Skupštine.

S poštovanjem,

Dostavljeno:

1x Naslovu

1x Predsjedavajućem Skupštine, (na znanje),

1x U spis predmeta-03



02

Sarajevo, 18.07.2025. godine
Broj: 446/25

BOSNA I HERCEGOVINA
FEDERACIJA BOSNE I HERCEGOVINE
ZENIČKO – DOBOJSKI KANTON
Ministarstvo za pravosuđe i upravu
Kučukovići br.2
72 000 Zenica
n/r Nebojša Nikolić, ministar

ZENIČKO-DOBOJSKI KANTON			
PRIMLJENO: 22-07-2026			
Org. jedinica	Klasifik. oznaka	Redni broj	Broj priloga
06-04-3-9284			4/25

PREDMET: Obavijest, dostavlja se

Poštovani,

u vezi sa Vašim aktom broj: 06-04-3-9284-2/25 od 20.06.2025. godine, u kojem tražite izjašnjenje Saveza općina i gradova Federacije Bosne i Hercegovine o Prijedlogu Zakona o obilježavanju značajnih datuma i događaja na području Zeničko-dobojskog kantona, obavještavamo Vas da smo isti dostavili jedinicama lokalne samouprave iz Zeničko-dobojskog kantona na izjašnjenje, odnosno na dostavu komentara, mišljenja i sugestija.

U zadatom roku, od strane jedinica lokalne samouprave sa područja Zeničko-dobojskog kantona nismo zaprimili komentare na navedeni Prijedlog Zakona.

Za eventualna dodatna pitanja, stojimo Vam na raspolaganju.

S poštovanjem,

Vesna Travljanin
Direktor Saveza općina i gradova FBiH



Musala 5/I 71000 Sarajevo

Tel: +387 (0)33 216 502 +387 (0)33 209 024, +387 (0)33 209 120; +387 (0)33 552 811
Fax: +387 (0)33 552 810 +387 (0)33 216 502 / Email: savez@sogfbih.ba Web: www.sogfbih.ba